

Aschia secloma ina emissiun dil Radio Romontsch dil november 2021. Enzatgei miraculus? Segir buc, denton in eveniment che buca mintgin cun 96 onns si dies ha la curascha da seschar en. Atgnamein era miu intent dad ir per la davosa gada sil Péz Terri cun 95 onns e cun quella caschun prender definitivamein cumiau da quel. Denton, a quella speculaziun ha la corona cun sias prescripziuns e cundiziuns fatg in gries streh tras il quen. Malgrad quei impediment haiel jeu buca fiers la faulsch el canvau. Evident era a mi che mia finamira pretendeva la cundiziun corporalaneccessaria. Cun mintga onn retard vegn quella pli pintga. Sebasond sin quella ponderaziun, hai jeu gia la primavera vargada decidiu da sepreparar seriusamein cun far regularmein turas da muntogna inclus da quellas da 2000 m sur mar. L'aura varionta dils meins da stad ei buca stada tut quei che jeu havess giavischau, mo la speronza da tonaton contonscher miu intent era restada. Ils 13 da settember 2021 essan Valeria, mia niaza, siu um Linus ed jeu parti ladamaun a bun'ura da Cuera cugl intent d'ascender l'auter gi il Péz Terri. Sur la ruta Cuera - Glion - Vrin, a nus beinenconuschenta, contonschin nus Puzatsch. A Parvalsauns terminescha la via carabla per vehichels a motor viers la Greina. Cul sacados buca memia plein prendein nus la via sut ils peis. Il suleg, per cletg stedi curclaus, fa il caminar emperneivels. Miu tempo denton selai buca cumparegliar cun quel d'avon 60 ni 70 onns. Contonschius il Pass Diesrut se decidin nus per ina beinmeritada pausa. Era il magun s'opponescha buca all'offerta che suonda emes patratgs van anavos a gis da catscha passentai en quella grondiusa cuntrada. Quasi secumblidaus en temps vargai, vesel jeu tuttenina mia beadia Vera e siu amitg ch'ei medemamein sin via viers la Greina.

Sco secunvegniu prendein nus l'auter gi il Terri
communablamein sut ils peis. Ussa en tschun cuntinuein nus il
viadi viers il Plaun la Greina. Arrivai a Crap la Crusch midein
nus en direcziun dalla camona da Motterascio. Ina
emperneivla ruta da caminar e las muntanialas miez
dumiastas selaian buca disturbar en la tschavera dad jarva
aunc stupent frestga. En quella camona passentein nus la
notg e da leu naven muntein nus l'autra damaun il Terri.
Sapientivamein havein nus elegiu la notg da gliendisgis sin
margis cun la speranza che paucas persunas seigien sin viadi
e cheutras buca vegnir en conflict cun las prescripziuns da
pandemia. Ina tscheina savurusa ed in suleagl tardiv migeivel
concludan in di plein tensiun. L'emprema damonda l'autra
damaun: nua ei il tschiel blau? Ina cozza cumpacta da nebla
zuppenta ils aults. Da quei schein nus denton buca disturbar e
semettein ladinamein sin via. Rodund melli meters differenza
d'altezia ein da surmuntar. Damognel jeu quei e co stat ei cun
l'aria che vegn pli ault ch'ins ei pli e pli fina? Pass per pass en
tempo moderau sevischinein nus al Tgamin. Camutschs e
capricorns dretg e seniester accumpognan quei quintet sin
via e procuran per distracziun. Sil Tgamin, quei punct marcant,
vulevel jeu deponer miu sacados entochen che nus turnein.
Valeria ei d'auter meini. Ella carga miu sacados sil siu e nies
viadi vegn cuntinuaus. Storta dretg, storta seniester, negin
selamenta, e tuttenina stein nus avon la crusch sigl ault dil
Terri. Nies punct desiderau ei contonschius! In levgiament che
vegn cumpletaus cun gratulaziuns e naturalmein era cun
fotografias. Denton, la brentina ha negina cumpassiun cun nus
ed era il vent ei vehements, pia buca exnum aura da passentar
uras sil péz. La ruta da descensiun meina dil Tgamin dretg giu
viers la Val Canal - Plaun la Greina.